

AS TRINDE

1. RIT

Jol 2:12-18

Akar dapanim: Ia uan osimtizim akakaghisi uan korotiaba pura da bighan marki. Puvati, ian arazir kuraba bagh ia uan navir averiamin aven bar osemegh.

Akar kam, Godin akam inigha izir gumazim Joel, an osiri.

Egha Ikiavira Itir God kamaghin
migei,
“Guizbangira, bizir kurar kaba bar
otivam,
eghti ia datirighira uan navibagh
iragh ua na bagh izi.
Egh dagheba ategh uan navir
averiaba sara azi ua na bagh izi.
Ia pura uan korotiaba abighiva azir
arazim damuan marki.
Puvati, ian navir averiabar aven
bighreghegh egh ia ararem akagham.
Ia fo, Ikiavira Itir God gumamaziziba
bar me gifongegha bar men
kuarkufi.
Egha a zuamirama atarir pu. Puvati.
An apangkuvim bar moghira men
ekefe.
Egha a zurara uan nighnizim
gighasa ifongeghavira ikia, egha
gumamazizibar arazir kuraba
ikarvazir pu.
Kamaghin, ia ua Ikiavira Itir God, ian
God bagh izi.
Ia ua Ikiavira Itir God, ian God, a
bagh iziti,
a ti uan nighnizim giragh, egh
deraghviram ia damuam, egh
dagher aviriba ia daningam.
Eghti ia a bagh ofa damuamin
dagheba ko wainba ikiam.
Ia Saionin mighsiamin iki isighabagh
ivi.
Egh dagheba ateghamin dughiam
ginabagh,
egh gumamazizibav kemeghti, me
nan ziam fisi uari akufagh.

Egh gumamaziziba bar me akuvagh,
me mikimti,
me nan iziam fisi, uan bizir kuraba
ko arazir kuraba ategh nan
damazimin bar zuegh.
Men gumamazizir ghuriba ko,
borir ekiaba ko otem apir borir
iririviba, me bar moghira, ni me
inigh izi.
Poroghamir igiaba, me uan
dipeniba ategh uaghan izi.
Nan ofa gamir gumaziba, me nan
ingangarir gumaziba, ni me
mikemeghti,
me Godin Dipenimin tiar akam ko,
ofa gamir dakozimin tongin tugh
azi arang kamaghin mikim,
‘O Ikiavira Itir God, e nin
gumamazizibara.
Eghti ni uan gumamazizibar
apangkufigh.
Puvatightima, kantriba bar, akirim
ragh e gasaragh egh dibovir
akabar e mikimam.
E nin azai, ni kantrin igharazibar
gumamaziziba ateghti
me e dipova kamaghin mikiman
kogham, ian God managh iti?”
Ezi Ikiavira Itir God, bar puvira uan
nguazim ginighnigha,
uan gumamazizibar apangkuvigha
men akura.

Kar Godin Akam.

SAM

Sam 51:3-6, 12-14, 17

Ia akam ikaragh: Ekiam, ki arazir kuram gami. Ezi ni nan apangkufigh.

O God, ni uan apangkuvir arazimin gin mangi, egh nan apangkufigh.
Ni apangkuvir ekiam kam nan iki, egh nan arazir kuraba batokegh.
Gumaziba rua ua zue moghin,
ni na rueghti nan arazir kuraba mangighti ki zueka.

Ia akam ikaragh: Ekiam, ki arazir ikuram gamigha gifa, ni nan akuragh.

Ki fo, ki arazir kuram gamigha gifa.
Egha arazir kurar ki amizir kam, ki a ginighnighavira iti.
Ki bar nirara, nin damazimin arazir kuram gami.
Ni uan arazir aghuimin gin ghua na isa kot gatigha, nan arazir kuraba bagha
ivezir kuram na ganingi.

Ia akam ikaragh: Ekiam, ki arazir ikuram gamigha gifa, ni nan akuragh.

O God, ni nan navir averiam damighti a zuegh ua igiamin otogh.
Eghti nin ifongiar aghuim nan aven iziti ki nirara ganam.
Nin Duam nan aven iti,
ezi ni uabin boroghin na batuegh, na dam uan duam inian marki.

Ia akam ikaragh: Ekiam, ki arazir ikuram gamigha gifa, ni nan akuragh.

Ni faraghavira ua na inizi ki ni bagha bar akonge.
Ni datirighin bar akongezir arazir kam na daningigh.
Ki nin akabar gin mangamin ifongiar kam, ni ua na daningigh. O Ekiam, ni nan
akuraghti,
ki deragh eghaghanibagh fogh nin ziam fam.

Ia akam ikaragh: Ekiam, ki arazir ikuram gamigha gifa, ni nan akuragh.

2. RIT

2 Ko 5:20-6:2

*Akar dapanim: Datirighin, dughiar God deraghvira e damuamim. Datirighin, dughiar God
uam e iniamim.*

**Akar kam, akinafarir namba 2 Pol Korinin gumamaziba baghava an
osirizimin aven iti.**

Kar e Kraisin abuir gumazibar
otivigha, mati God uabi uan dimdiam ia
ganingizi moghin, e akar kam ia mikiri.
Kamaghin, e Kraisin danganim isa, ia
gakaghora ghaze, ia Godin apanim
gamir araziba ategh an namakabar
otifigh. Krai uabi arazir kuratam
gamizir puvati. Ezi God kamagh sua, e
Krais ko porogh, egh an gavgavimin
e Godin damazimin gumamazizir
aghuibar otivam. Kamaghin, God en
akurvaghasa egha, en arazir kuraba

bar Krai gisin da ariki, ezi Krai mati
uaghan gumazir arazir kurabagh amir
mamin min oto.

E God ko ingara egha pamten ia
gakaghora ghaze, ia gumamazizir
Godin apangkuvim iniziba, ia aneteghti
a pura bizimin min otivan marki.
God kamaghin migei, "Dughiar ki
ian kuarkuvigha atizim, an otozi,
ki ian dimdiam barasi. Dughiar ki
ian akurvaghasa atizim, an otozi,
ki ian akura." Ia oragh! Ki ian

kuarkuvighamin dughiam datirighin
otos. Ezi uaghan ki ian akurvaghamin
dughiam datirighin otos!

Kar Godin Akam.

WELKAMIM GUTNIUS

Ekiām Kraīs Iesūs, e nīn iziām fa iziār ekiām nī ganīdi.
Ia Ekiāmin akam baragh. Egh akirim ragh an akam gasan mark.
Ekiām Kraīs Iesūs, e nīn iziām fa iziār ekiām nī ganīdi.

GUTNIUS

Mt 6:1-6, 16-18

Akar dapanim: Nīn afeziām, bizir modoghav itibar gari, egh a nīn ivezim nīn ikarvaghām.

Ia, Kraīs Iesūsīn Akar Aghuir Matyu osirizim, a baragh.

Egha Iesūs ua kamaghin migei, “Ia deraghvira gan. Ia gumamaziziba gansi osamiva, arazir aghuibar amuan marki. Ia kamagh damu, uan Afeziar uan Nguibamin itim da ivezitam inighan kogham.

“Egh ia bizitam isi gumazir asaghasazitam daningsiva, tav amadaghtima a mangi ian arazir aghuir kam an gun mikiman marki, egh mati gumazir maba me God ko migeir dipeniba ko tuavibar tuiva odava ami moghin. Ia men min damuan marki. Kamagh amir darazi, me gumamazizibar damazibar uan araziba akakaghtima, me men ziaba fasa. Ki guizbangira ia migei, me uan ivezim inigha gifa. Ia asaghasazitamin akurvaghsi, ian agharir guvim arazir kam damuti, agharir ikiriam arazir kam gifoghan kogham. Eghti ian akurvazir arazir kam averara ikiti, ian Afeziar bizir mogomebar garim, ian arazir aghuim ikaragham.”

Egha Iesūs ua kamaghin migei, “Ia God ko mikimsi, gumazir ifavariba ami moghin damuan marki. Me God ko migeir dipeniba ko tuavir ekiabar akabar tuiva, God ko mikimasa bar

akonge. Me odava, egha ghaze, gumamazizir aviriba nan ganigh nan ziam fam. Ki guizbangira ia migei, me uan ivezim inigha gifa. Egh ia God ko mikimsi, uan dipenir averiamin mangi tiam asaragh, egh modogh ia uan Afeziar ko mikim. Kamaghin, ian Afeziar bizir mogomebar garim, a ian ivezim ia daningam.

Egha Iesūs ua migia ghua ghaze, “Ia dagheba ataghrazir dughiamin ia gumazir ifavaribar min uan guabagh ekuan marki. Gumazir ifavariba dagheba ataghrazir dughiamin, gumaziba men ganasa, me uan guaba ruer puvatigha pughpurighav arui. Me odava arazir kabagh ami. Ki guizbangira ia migei, me uan ivezim inigha gifa. Eghti ia dagheba ataghrazir dughiamin, ia boreu uari aghiva uan guaba ru, eghti gumaziba ia dagheba ataghrazir arazir kam gifoghan kogham. Eghti ian Afeziar danganir mogomemin itim, anarira ian ganigh fogham. Egh gin ian Afeziar bizir mogomebar garim, a ian ivezim ia daningam.”

Kar, Kraīs Iesūsīn Akar Aghuim.

